

Il 19 d'avrel: Sogn Gerold, confessur



Sogn Gerold, parents digl imperatur Otto il grond, fuva staus duca dalla Saxonia. El ha regiu quella tiara biars onns e dau a tuts pli cun exempel che cun plaids la tema da Diu e co survir ad el. Lu eis el vegnius muentaues da bandunar il mund e sia gloria per encurir sulettamein il reginavel da Diu. El suonda la vusch dil Spért sogn, surdat il guvern da siu ducadi ad in da ses fegls cun recumandar ad el sia dunna, ses auters affons e tut ses subdits. Lu pren el in asen che porta sia bagascha e banduna zuppadamein la tiara per viver en in liug

solitari gest leu nua che siu asen vegni a sefermar.

Da Saxonia arrivavan els a Bregenz e da leu a Feldkirch ed a Frisun en la val Drusiana. Egl uaul sper in detg ruver ei igl asen sefermaus, semess giu e buca vuliu pli far in pass anavon. Il duca Gerold ha capiu ch'el duessi sefermar cheu e consumar sia veta enten survir a Diu. Sco εμπrem ha Gerold costruìu leu ina hetta per saver habitar e survir fideivlamein a Diu. El era ussa semtgaus d'ademplier la voluntad divina. Beinduras vegneva el visitaues, confortaus, instruìus e spisgentaus dils aungheis. En quei solitari eis el vivius biars onns senza che zatgi vessi saviu ch'ei fussi cheu in carstgaun.

Damaneivel da Feldkirch sin in tgiembel steva il casti dil cont Otto de Jagberg, Werdenberg e Montfort. Quei signur ha in di tarmess ora ses catschadurs ensemen cun auters cumpogns per far catscha sin in uors. S'encurschend ch'el possi buca mitschar dils catschadurs muort ils biars tgauns che devan suenter, ei igl uors sefultschaus egl eremitadi dil ruver da sogn Gerold ch'era gest vid far oraziun. Il sogn retscheiva e protegia quei animal, sco sch'el fuss ina nuorsa e catscha naven ils tgauns cun siu fest cun dar scamond ad els d'urlar. Mo ils catschadurs fuvan gia cheu. Els vesan il sogn eremit, han lu pigliau tema e semess en schanuglias e rugau da perdunar. Ils catschadurs tuornan a casa e raquantan al cont tut quei ch'els vevan viu sin la catscha.

Otto, sia dunna Benedicta e dus da ses fegls ein vegni muntaus da quei raschienen ed els serendan en Val Drusiana tier igl eremitadi da quei nunenconuschent sogn ed anflan quel en oraziun. In'uriala discuoran els ensemen e cura ch'il cont ha giu entelgiu tgei veta che Gerold meini cheu e tgei finamira ch'el hagi da vuler viver aschia per amur da Diu, ha cont Otto schenghegiu ad el ina gronda part dalla val cun uaul e fons vitier. Sinquei ha il sogn eremit schau baghegiar ina pintga claustra che stat aunc oz leu e vegn numnada la probstura da sogn Gerold. Igl uors ei adina restaues tier sogn Gerold e surveva ad el per portar aua, lenna e crappa.

A casa en Saxonia veva sogn Gerold aunc ils dus fegls Cuno ed Udalricus. Quels dus ein per part vegni muntaus dad esser ensemen cul bab e per part da far il medem sco lez. Pia han els bandunau lur patria per ir aschiditg e lunsch per la tiara entuorn, entochen ch'els hagian anflau lur bab. Suenter liung retscherchar han els enderschiu il liug zuppau e lu era anflau lur

bab per consolaziun e profit. Pertgei tras siu sogn exempel e sias saluteivlas admoniziuns han els menau il dies al mund, daventai eremits e vuliu ensemen cul bab survir sulettamein a Diu. Cun urar, vegliar e passentar il temps en sontgadat han els entschiet a far miraclas.

Sogn Gerold vegneva savens visitaus da glieud che leva esser instruida cun sontgas admoniziuns e cussegls, per saver carezar e survir a Diu. La scadiola dil sogn vegn aunc oz tenuta si. Quels che vevan febra ni eran schiglioc malsauns e buevan ord quella vegnevan puspei sauns. Ins ha era anflau scartiras che documenteschan che sogn Gerold hagi era scatschau demunis, dau la vesida a tschocs, l'udida a suords e la faviala a mets.

Cura che sogn Gerold ha encurschiu che la fin da sia veta fussi damaneivel ha el cavau ora enzacons tschespets da quei funs ch'era schenghegiaus ad el, mess quels en sias tastgas e serendus cun ses dus fegls Cuno ed Udalricus a Nossadunaun. Leu en la sontga caplutta ha el surdau quels tschespets a Nossadunna sigl altar e regalau alla Regina dil tschiel sia pintga claustra, ses dus fegls e sesez cun funs, uaul e tut quei ch'el veva egl eremitadi a Frisun. Tala donaziun ha la claustra da Nossadunaun acceptau ed ella posseda aunc oz quella che vegn manischada d'enzacons paders e che vegn numnada la probstura da sogn Gerold. Suententer haver fatg unfrenda e devoziun a Nossadunaun ei il sogn puspei turnaus en sia cella a Frisun e cuort sisu morts beadamein ils 19 d'avrel digl onn 978. Ses dus fegls han satrau il tgierp a Frisun en sia baselgia.

Suententer la mort da sogn Gerold ein ils dus fegls - sco lur bab veva cumandau - i en la claustra da Nossadunaun e vegni pri si egl uorden da sogn Benedetg. Leu ein els vivi biars onns. Cuno ei daventa decan, Udalricus denton custos. Alla fin avon che murir ein els serendi a Frisun en lur claustra sper Feldkirch per murir leu beadamein. Udalricus ei vegnius satraus sper siu bab, Cuno leu damaneivel en la caplutta da sogn Antoni. Omisdus ein passai da questa veta en sontgadat e cun enzenas da claras miraclas.

Reflexiun

Ventireivels quels affons che han buns geniturs. Mo il cuntrari, paupers quels affons che han bab e mumma senza devoziun e senza tema da Diu. Tgi ei stau la caschun che Cuno ed Adalricus han bandunau tut quei dil mund, per encurir sulettamein il reginavel da Diu? Senza dubi lur sogn bab ch'ei ius ordavon cul bien exempel. Il pum croda buca lunsch naven dil pumer, di il proverb; e sco ils vegls contan, aschia emprendan ils giuvens! Babs e mummas che sesprovan da mussar a lur affons buca mo cun plaids, mobein cul bien exempel, astgan sperar sin buns affons.

Co duein ils affons imprendar da viver bein ed endretg, sche bab e mumma vivan ina veta munglusa? Quei ch'els vesan, fa pli gronda impressiun che quei ch'els audan. Ductrinas ed admoniziuns vegnan ad effectuar pauc senza il bien exempel. Propr. Curiens. Helvetia sancta.